

摘藻堂四庫全書薈要

集部

欽定四庫全書薈要

集部

小畜集卷一至三

臣

王杰詳校


詳校官助教臣常循



欽定四庫全書薈要

小畜集

提要

  
臣等謹案小畜集三十卷宋王禹偁撰禹偁

字元之鉅野人太平興國八年進士官至翰

林學士知制誥屢以事謫守郡終於知蘄州

嘗自次其文以易筮之得乾之小畜因以名

集晁公武讀書志陳振孫書錄解題皆作三

十卷與今本目次正同宋志云二十卷者字  
有脫誤也宋承五代之後文體纖儷禹偁始  
為古雅簡淡之作其奏疏尤極醇茂宋史採  
入本傳者議論皆英偉可觀在詞垣時所為  
應制駢偶之文亦多閎麗典贍洵一時作手  
正不獨史所稱直躬行道為足重也集凡賦  
二卷詩十一卷文十七卷紹興丁卯歷陽沈  
虞卿嘗序而刻之黃州明代未有刊本故世

多鈔傳其詩而全集罕覩近有趙熟典者始求得宋槧本刻於平陽而中亦間有闕字無可校補今姑仍之陳振孫又謂禹偁尚有承明集十卷奏議集三卷則今皆不傳矣乾隆四十一年五月恭校上

總纂官

臣紀昀  
臣陸錫熊  
臣孫士毅

總校官  
臣陸費墀



# 小畜集原序

內翰王公以文章道義被遇太宗皇帝視草北門代言  
西掖眷優接隆聲望最重咸謂咫尺黃閣矣偶坐事左  
遷咸平初來于齊安在郡政化孚洽容與暇景作竹樓  
無愠齋睡足軒以玩意邦人沐浴恩惠為繪像立祠東  
坡居士嘗親拜其下歷歲滋久經涉兵盜無一存者風  
範歇絕音徽眇然良可太息平生撰著極富有手編文  
集三十卷名曰小畜集其文簡易醇質得古作者之體

往往好事得之者珍秘不傳以故人多未見虞卿假守于此追訪舊址躊躇增慨想見其人思欲以次興葺而鈍拙無能救過不贍輒且先其大者因以家笥所藏小畜集八本更加點勘鳩工鏤板以廣其傳庶與四方學者共之紹興丁卯皇上祀紫壇之明年六月庚申歷陽沈虞卿書



欽定四庫全書薈要卷一萬四千一百二十六

集部

小畜集卷一

宋 王禹偁 撰

古賦

籍田賦

園陵犬賦

大閱賦

三黜賦

罔極賦

籍田賦 并序

臣謹按周制孟春之月天子親載耒耜躬耕籍田所以  
事天地山川社稷先王醴酪粢盛於是乎取之恭之至  
也自周德下衰禮文殘缺故宣王之時有虢公之諫秦  
皇定伯鮮克由禮漢祖隆興日不暇給孝文孝景始復  
行焉昭帝弄田亦其義也後漢永平中明帝東巡耕於  
懷縣非古制焉魏氏親耕闕百官之禮蓋草創爾晉武  
太始之年畧脩隆典宋文元嘉之代亦舉舊章齊用丁

亥之辰梁以建卯之月後魏北齊沿革有異隋朝唐室  
文物可觀太宗行之於前明皇繼之於後自茲已降廢  
而不行將煥先農必待真主皇家享國三十載陛下嗣  
統十四年武功已成文理已定乃下明詔耕於東郊百  
執悅隨三農知勸禮官博士蹈舞而草儀甸師嗇夫歌  
詠而供職右拾遺直史館王禹偁再拜而颺言曰耕籍  
之義大矣哉千畝之田三推之禮所以教諸侯而事上  
帝率人力而成歲功實邦國之彛章皇王之大典肯潘

安仁賦之于晉岑文本頌之于唐今王道行矣王籍修  
矣神功帝業煥其有光宜暢頌聲以播樂府謹上籍田  
賦一章雖不足形容盛德亦小臣勤拳之至也其詞曰  
十四年兮帝業遐宣寰區晏然乃順考于古道將躬耕  
乎籍田務本勸農稽前文而備矣事神教養舉隆典以  
行焉萬國歡心而懌懌百官供職以虔虔草儀注于有  
司議沿革于遺編築壇墠之三陞開阡陌之百廛文物  
聲明合禮經而有度旌旂衣服應方色而不愆既而屆

孟春擇元日太史先奏天子將出是月也適人徇路星  
鳥中律當東郊之迎春是東作之平秩皇帝于是即齋  
宮辭帝室戒錫鸞嚴警蹕乘青輅以有威儼朱紘而無  
逸佩于玉也懸黎之色蒼蒼載其旂焉干呂之雲鬱鬱  
屬車負播殖之器後宮獻種稔之實紅縻黛耜服葱牯  
以陸離縹軛紺轅駕蒼龍而飄歛太常之禮具舉司農  
之屬各率甸師掌舍警御陌以惟嚴封人野廬設壇宮  
而靡失于國之東千官景從風清塵而習習雨洒道以

濛濛時也木德盛陽氣充春芒甲拆青青兮葱葱春土  
覲起油油兮溶溶冠蓋蔽野珮環咽風狀浮雲兮隨應  
龍旂幟張日車徒塞空若衆星兮環紫宮修農事以惕  
惕襲春服之重重爾乃配少皞祠先農尸祝無媿豆籩  
以供太牢之牲薦之而肥腍太簇之樂奏之而春容于  
是修帝籍勞聖躬撫御耦以無怠履游塲而有蹤將循  
乎千畝之制豈止乎數步之中耕鈎盾之弄田但矜兕  
戲修建康之春籍未煥農功有以見萬乘之尊三推而

舍或五或九降殺之義有倫爾公爾侯貴賤之班相亞  
嗇夫洒種以斯畢庶人終畝而告罷千耦其耕煥乎禮  
成播百穀兮率人力歌載芟兮揚頌聲將見乎餘糧棲  
畝腐粟如京神倉令納乎黍稷以備粢盛廩犧氏收其  
藁秸用餉犧牲親畎畝兮化被重民天而教行自得訓  
農之實非貪慕古之名然後下青壇歸絳闕百姓知勸  
羣后咸謁在鎬之宴啟歌虞之音發獻萬壽兮懽呼奏  
九韶兮鏗越開三面以行惠宥五刑而慎罰恩流于孝

悌力田德被于雕題辯髮興五土之利固必躬而必親  
同三代之風復不矜而不伐大矣哉籍田之禮豈三年  
而不為躬耕之義將百代而可知我所以舉久廢之典  
定不刊之儀慮弗勤於四體將有害于三時務農桑兮  
為政本興禮節兮崇教資民乃力穡歲無阻饑神農斲  
木之功我其申矣后稷播時之利我得兼之供秬鬯以  
斯在介豐年而有期丕顯事天之禮誕歌祈社之詩祀  
山川兮神鑒明矣配祖考兮德馨遠而永錫純嘏用光



孝思乃作頌曰倬彼東郊公田是闢大君戾止言耕其  
籍帝籍既修乃及公侯親爾耒耜勤爾田疇言采黍稷  
祀于圓丘億萬斯年以承天休又曰倬彼東郊耕壇其  
崇大君戾止言訓其農農功既勗乃知榮辱爾家以給  
爾人以足言奉蒸嘗遍于比屋億萬斯年以介景福

園陵犬賦

嘉彼御犬既良且馴蒙先朝之乃眷向皇宮而託身有  
警蹕以皆從无起居而不親繡組飾以煒煒金鈴奮而

振振餉以公庖彭澤之魚兮曾何足道畜之土性西旅  
之獫兮詎得同倫健遂天步慵眠地茵効珍比夫異獸  
供命等乎適臣若乃風暖掖庭花繁禁籞扇俟錦翼之  
雉籠近雪衣之女入赭袍兮曳尾聞霓裳兮率舞循遶  
乎金塘徘徊乎瑤圃睨睨爐烟追隨蠟炬見觀書于乙  
夜聽求衣于未曙既無吠乎拔籤每夙興于曉鼓莫不  
嘿識聖心潛知天語備指顧以弗迷奉周旋而見撫第  
辰遊而夕嬉又安在乎逐麋而捕鼠彼宋狙之與韓獺

又安得同羣而接武者哉嗟乎事變人天時移今古秦  
皇採藥島中之士未迴軒后鍊丹湖上之龍已去久舐  
鼎以登仙對遺弓而戀主卧錦薦兮罔安啗鮮食兮彌  
苦豐顱載減負重鉞而不勝病骨其羸求敝葢于何所  
赫赫顧命明明嗣皇念犬馬之微誠義存始卒徵父母  
之所愛深增盡傷俾守園陵之地且殊盤飢之鄉縻索  
緇以璀璨琢籠檻而熒煌仗陪鹵簿車逐輶輶鑠玄宮  
兮黯黯號白日兮茫茫松阡夜月柏城曉霜依六尺之

輿已成疇昔盜一坏之土亦足隄防表終天之巨痛甘  
朽骨于龍岡狡兔盡而見烹禮殊炎漢駿馬死而陪葬  
事類皇唐邈予生之介立荷太宗之維繫叨澤宮之一  
第玷承明而三入恥懷祿以不言維報君之是急胡薄  
命之多屯顧寸功而莫集嗟白首于郎署慟梓宮而鳴  
悵生未得圖形煙閣想英衛之難追死不當賜葬長陵  
豈蕭曹之能揖異臣哉之可歌信尤也之罔及聊作賦  
以自傷寄毫端而雪泣

# 大閱賦

大閱之義載于春秋彼乃一國之軍禮千乘之諸侯曾  
未若天子之大閱揚神武而闡皇猷天祚有宋授禪于  
周太祖以武功戡定太宗以文德懷柔億兆人兮頌聲  
作四十載矣王澤流二后上仙貽厥孫謀一人繼統承  
天之休大舜孝思四海遏密高宗諒闇三年宅憂俯順  
先王之喪紀重違百辟之勤求于是延英入閣端冕凝  
旒鈞臺錫宴拊石鳴球天地同和覩來庭之鳳舞君臣

相遇歌在藻之魚游惟聖克念惟皇聿修方欲生擒頡  
利血滅蚩尤輯大勲而光祖考練武經而平寇仇以為  
天生五材孰能去其兵革武有七德予將整乃戈矛時  
也鷹隼擊虹蜺收隕籜飛乎原隰嘉禾歛乎田疇因農  
隙而順時令數軍實而修戎政野廬設次甸師奔命御  
幄立而天開教塲平而霜勁雷動風行千騎萬乘于以  
威八荒于以安百姓師出以律我所以表嚴壯之稱噐  
不示人我所以執征伐之柄乃幸近甸出重城天步順

動帝車啟行申軍令以偃草揭靈旂于畫荆赳赳洸洸  
衛社之將帥皇皇濟濟扈蹕之公卿從龍雲合捧日霞  
生鹵簿前驅按禮文而不忒招搖在上法天象而有程  
肅肅戈戟鏜鏜鼓鉦期門欣飛雲蒸而鱗萃材官騎士  
岳立而山橫旌旗衣服文物聲明列羽林之仗空細柳  
之營錫鸞和鈴鏗天籟於曉吹槍櫓鋒盾戢星芒于太  
清皇帝乃降步輦陞帳殿明誓六師誕修一戰法武侯  
之陣示以縱橫按風后之圖親加訓練出游兵以定兩

端握奇數而制四面搖乾蕩坤飛霆走電八尾四頭千  
化萬變開合舒卷若常山之蛇蟠沸渭喧闐如滄海之  
鰲拊則有超乘賈勇戲車為郎挾輶射戟挽強斃張劍  
倚青漢戈揮太陽可以越巨壑踏崑岡氣壓乎北方之  
強又若屈產新羈渥洼逸駕汗血蘭筋騰霜照夜師子  
花獐胡孫色赭可以走高山突平野勢吞乎南牧之馬  
莫不虓若虎貔猛如熊羆鏖兵神速曠騎颭馳前禦其  
前必叅長而補短陣間容陣亦鴈行而魚麗疾徐有節



動靜有期無窮如天地之運轉不竭如江漢之渺瀰沒  
而復出如兩曜盡而復生如四時同子弟之親父兄急  
難相救若手足之扞頭目斯須不離屹屹然立不敗之  
地堂堂乎成无敵之師以虞待不虞則禍亂息矣治多  
如治寡則進退隨之所謂有備無患居安慮危保寧宗  
社震讐蠻夷暢皇威于禹畫生兌悅於堯眉夫如是岐  
陽大蒐安能竊迹驪山講武不足稱奇以此攻城何城  
不克以此平戎何戎不北兵雖恃乎服習戰必分其曲

直周武桓桓之衆尚以仁而伐不仁漢高將將之材固  
闕智而不聞力既而皇歡洽白日斜還北闕御東華宴  
喜斯備慶賞有加氣增堡障聲動幽遐通大漠極流沙  
佇見破天親可汗之名風行紫塞賜奉國契丹之印永  
屬皇家帝庸作歌曰順時獮狩安邊禦寇揚我武兮師  
人輯睦軍陣習熟威醜虜兮不教而戰祇取敗兮不戢  
自焚予深戒兮近臣再拜而賡歌曰秋大閱兮威窮邊  
兵力銳兮人心堅封狼居兮禪姑衍抵瀚海兮登燕然

俾遁逃兮无地咸扶服兮朝天无外之化兮被率土升  
中之禮兮告上玄然後飛英聲介景福億萬斯年

### 三黜賦

一生幾日八年三黜始貶商於親老且疾兒未免乳呱  
呱擁樹六百里之窮山唯毒蛇與鬻虎厯二稔而生還  
幸舉族而无苦再謫滁上吾親已喪几筵未收旅櫬未  
葬泣血就路痛彼蒼兮安仰移郡印于淮海信靡盬而  
鞅掌旋號赴于國哀亦事君而送往叨四入于掖垣何

寵祿之便蕃今去齊安髮白目昏吾子有孫始笑未言  
去无騎乘留无田園羝羊觸藩老鶴乘軒不我知者猶  
謂乎郎官貴而郡守尊也於戲令尹无愠吾之所師下  
惠不恥吾其庶幾卞和之刖吾乃完肌曹沫之敗吾非  
輿尸緘金人之口復白圭之詩細不宥兮過可補思而  
行兮悔可追慕康侯之晝接兮苟无所施徒錫馬而胡  
為効仲尼之日省兮苟无所為雖歎鳳而奚悲夫如是  
屈于身兮不屈其道任百謫而何虧吾當守正直兮佩

仁義期終身以行之

罔極賦

後周廣順太歲甲寅季秋戊子實生吾身稟粹和于兩儀荷鞠育於二親粵自始孩逮乎成人求名得名干祿得祿痛吾母之早終受君羹而舍肉丁吾父之大憂徒倚廬以食粥被朝恩之抑奪履人事而棲迷五鼎或來美仲由之斗米三牲縱具非茅容之隻雞豈无兄弟各懷祿而悽悽亦有子孫方嬉戲乎孩提冗食兮紀綱之

僕多病兮糟糠之妻望松楸以暮泣履霜露而晨啼今  
日何日家人舉爵祝我壽考勸我歡樂感懸弧于茲晨  
念陟岵而淚落換斑衣兮純素變華顛兮總角孰謂儒  
者不如農夫良田十畝柔桑百株無求于人身何憂其  
悔吝必出于力養不間乎精麤父母俱存緼袍重襦子  
弟匪懈夕耕曉鋤雞豚掩豆黍稷盈壺草堂為壽其樂  
只且嗟乎吾不得而及也賦罔極而長吁

小畜集卷一

欽定四庫全書薈要卷一萬四千一百二十七

集部

小畜集卷二

宋 王禹偁 撰

律賦 有序

禹偁志學之年秉筆為賦逮乎策名不下數百首鄙其  
小道未嘗輒留秋試春闈粗有警策用能首冠多士聲  
聞於時然試罷即為同人掠奪其草于今莫有存者淳  
化中謫官上雒明年太宗試進士其題曰卮言日出有  
傳至商山者駭其題之異且難也因賦一篇今求向所

存者得數千紙焚棄之外以十章列為一卷仍以卮言  
為首尊御題也

卮言日出

天道如張弓

仲尼為素王

君者以百姓為天

復其見天地之心

尺蠖



聖人无名

素籥

醴泉無源

火星中而寒暑退

卮言日出賦

盈側空仰隨變和美

卮之為物也空則仰滿則傾  
伊斯言之无係假厭器而  
强名日出彌新尚安知其  
適莫天倪自得亦胡繫於  
虚盈豈不以卮无所識每  
逐物而歆側言无所執但  
因時

而語嘿諒何思而何慮固靡失而靡得用能滿天下以  
无過體寰中而可則徒觀夫卮牖以弗定言支離而  
不窮孰見兆朕難明始終冥其心若虛舟之泛水應乎  
物類天籟之鳴空是以至道无形至人絕想詎難追於  
駟馬實冥求于罔象以不器之器是資以不言之言為  
上存于身則大智之閑閑移於邦則王道之蕩蕩喻鳴  
鐘之大小物莫我欺取膠柱于樞機吾將安仰大哉卮  
也者既異欹器且殊漏卮言也者亦匪確論又非詭隨

知萬物之種也奚千里而應之智過挈瓶樗杌之書徒爾信踰盈缶連山之象云為故曰不言則齊同形相禪巧如簧兮非偶卒若環兮无變得之者毀譽兩忘失之者是非交戰詳夫庖有空滿于義則那言无準的在理云何亦猶君不言而默首化天不言而玉燭和是以大道五千取不知而立誠寓言十九藉外論以同波令我后據北極之尊窮南華之旨思欲體清淨而率兆庶故先命辭賦而試多士盛乎哉崇道之名不為虛美

天道如張弓賦

王者喻身則此宜施

上天如之何匪謙莫益張弓如之何匪高莫抑瞻倚杵  
之為狀考彎弧而取則所以老氏順之以立玄言王者  
法之而建皇極豈不以天實虧盈弓唯審固既命中以  
有式若無親而設喻善惡之効自應弦而靡差禍福之  
祥同流夫之所注吾嘗觀善射之人如天道兮有倫下  
者舉其勢高者俯其身左馬右人落穀中而不失十發  
九中視掌上而彌親又嘗觀上玄之理與張弓兮匪異

損有餘以示誠補不足而平施小人用壯唯六極而是  
惟君子好謙乃百祥而咸萃又嘗觀上聖之姿法天道  
兮緝熙令先禁於強暴心不忘于惇嫜百姓與能自樂  
裁成之道四時咸序爰歸輔相之宜天之道也既如彼  
弓之義也又如此懿乎男子之事克叶聖人之旨自可  
移于邦求諸己蓋裒多益寡者焉唯舉下抑高而已夫  
如是則張其弓挾其矢體由基之所長天道遠人道邇  
非裨竈之能量是以君者撫其弱抑其強如猿臂之盡

妙中鵠心而允臧向使天理或爽君道靡常自然反時而反德又烏可稱帝而稱王者哉故曰孰能以有餘奉天下唯有道者

仲尼為素王賦

儒素之道尊比王者

鳳鳥不至兮河不出圖聖人无位兮立教崇儒道之將行但棲遲而歷聘民受其賜猶南面以稱孤有以見同乎王者孰云乎蓋出司徒者也原其運屬陵遲力興儒素道將侔于皇極化實被于黔庶文行忠信設萬世之

紀綱禮樂詩書崇百王之法度于時也皇道有蕩周德  
下衰言念萬國將全四夷不有聖也誰其救之我所以  
行教化序尊卑造次顛沛兮于是東西南北兮忘疲用  
能定君臣父子之道述皇王帝霸之基夫如是則土無  
二以並矣位通三兮偉而異夫振乃素風齊諸大寶贊  
易象兮奉天時脩春秋兮行天罰講於洙水初彰化下  
之功登彼泰山宛契升中之道自然其教斯廣其號彌  
尊豈止同明於日月亦將比德於乾坤居無求安四載

之勤勞是效弋不射宿三驅之田獵斯存盖由宅一畝  
以卑宮佩五常而克己其位也困於陪臣其道也齊於  
天子列四科而升十哲八凱何殊誅正郊而斬俳優四  
凶竊比聖德洋洋同諸帝王行東脩而陳玉帛端縫掖  
而垂衣裳夢見周公求傳巖而允理問於老子師尚父  
而彌光大哉道濟古今教流華夏瞻不泯之廟貌若無  
疆之宗社悲夫商辛夏癸兮號獨夫又安得比于儒者

君者以百姓為天賦

君有庶民如得天也



勿謂乎天之在上能覆於人勿謂乎人之在下不覆於  
君政或施焉乃拂違於民意民斯叛矣同謫見於天文  
在乎觀百姓之勞逸豈止仰一氣之絪縕而已哉徒觀  
乎浩浩玄穹蚩蚩黔首覆盂之狀何在倚杵之形莫有  
苟知乎御之以道亦類乎戴之而走悠也久也固無杞  
國之憂養之育之宛是媯皇之手取彼穹旻方茲兆民  
匪在蒼蒼之色勿輕蠢蠢之人雖令不從反時之灾是  
比撫我則后無親之義斯陳可仰兮匪獨高明可畏兮

亦惟黎庶每慮其一夫不獲竊比于六龍以御驗惡紂  
以歸周似厭秦而授楚是知察彼哀樂同茲慘舒但人  
心之悅矣任天道之何如教以文章似列星辰之際示  
之淳朴疑歸混沌之初想夫君既柔懷民同剛克如黃  
畏兮則可苟暴殄而安得興人歌頌乃大舜之升聞自  
我聰明信惟堯之是則大矣哉善化民者以天為則善  
知天者以民為先若天人之理洞達則帝王之道敷宣  
寧資禪竈之言斯為妄矣自取夷吾之說不亦明焉今

我后子育兆民砥平九野上惟奉于穹昊下每矜于鰥寡自然以百姓為天萬方歸也

復其見天地之心賦

天地幽蹟觀象斯見

動者天地之用其震也勃焉靜者天地之本其復也寂然故二儀之心乃見七日之義斯玄自可要終而原始何必俯地而仰天豈不以復卦之義雷入于地既反本以無朕亦見心而有自蹠君不撓遂明萬化之源剥道方終未覩一陽之至其或鼓萬物盪六幽上健行而弗

息下剛克而勿休蒙亨艮止以時作雷動風行而不收  
此乾坤之功也心无得而可求及其化功成物理革高  
明之體无用沉潜之形莫索凝然若混沌之未鑿寂兮  
如庖犧之未畫此乾坤之本焉心有來而可賸得不窮  
動靜之旨審語默之端其心斯在其妙可觀聖人見之  
則政尚簡教尚寬棄智而化萬姓垂衣而總百官故帝  
堯之道文思安安非復之義者諒至此而攸難君子見  
之則反諸身視諸掌既絕慮于嗜欲乃游神于罔象故

孔子所謂其道蕩蕩非復之至者亦捨此而奚往是知  
運行者天地之時寂靜者天地之基心亦在其中也物  
莫得而見之坐忘遺照之人于茲得矣至日閉關之義  
何莫由斯我后端冕凝旒窮神知變希夷之理斯極清  
淨之風克扇大哉天地之心明明而可見

尺蠖賦

尺蠖之屈以求伸也

蠢爾微蟲有茲尺蠖每循塗而不殆靡由徑以或躍懼  
速登之易顛固將前而復却所以仲尼贊易取譬乎屈

伸老氏立言用嘉乎柔弱我嘗考畫卦之深旨見觀象  
之有以蓋美其時行則行時止則止寧鳬趨以鴻漸不  
磨驚而鵲起知進知退造幾微于聖人一往一來達消  
長于君子物有以小而喻大事可去彼而取此至若春  
日遲遲品彙熙熙知時應候附葉尋枝每委順而守道  
不躁進于多岐自中規而中矩非載驅而載馳其行也  
健而不息其氣也作而不衰曲乎形類彤弓之彎矣隆  
乎脊狀祝楮以陳之豈比乎蟲張網而役役蟻循磨而

孜孜者哉懿乎微物尚有伸兮有屈胡彼常流但好剛而惡柔苟克已以為用奚反身而是求得不觀所以察所由驗人事之倚伏考星躔之退留自然寒暑相推而歲功及物日月相推而大明燭幽者也其或昧其機循其跡不知我者謂我進寸而退尺探諸妙蹟諸神知我者謂我在屈而求伸異蜂蠆之毒唯思螫人等龍蛇之蟄實可存身夫如是則蛙黽怒而受式非度德者螳螂奮而拒轍豈量力也未若尺蠖兮慎行止明用捨予將

師之庶悔吝而益寡

聖人无名賦

元聖之道無得稱焉

聖人執大象體乾元雖有教以及下故无名于自尊仰之彌高強配乃神之號為而不有奚矜惟審之言原其先天之謂道體道之謂聖所以居域中之大所以為天下之正惟淡惟默固抱璞以含章不識不知豈命氏而考姓所謂上德不德无為不為其作也萬物斯覩其用也百姓弗知難審之于耳目徒象之于希夷亦猶微妙



者神焉蓋強而名矣蒼黃者天也但據遠視之徒觀其  
妙有羣生躬臨大寶寧鑽燧以啟祚豈巢居而建號聰  
明盡黜罔求濬哲之褒迹用弗彰但守虛無之道得非  
喪天下於華胥得寰中于道樞蛇身牛首兮非吾之耦  
雲官鳥紀兮莫我為徒孰躋王而黜伯孰追堯而禪虞  
其或稽之以帝籙皇圖則視之若無求之以溫恭允塞  
則名之莫得亦何必謂栗陸氏以居尊據軒轅氏而啟  
國者哉所謂莫之與京無得而稱採至賾以為用曷常

名而足徵凡父復生欲憲章而何取子長雖在思紀列  
以無能令我后尚黃老以君臨闡清淨而化下抑徽號  
於睿聖扇玄風于華夏有以見聖无名兮神无功信大  
人之造也

橐籥賦

天地之間其猶橐籥

伯陽以體道立言探乎極玄見乾坤之用也取橐籥而  
比焉豈不以德无疆者謂之地功不宰者謂之天譬翕  
張而氣作猶吹煦以聲傳用能萬物自化八音克全故

王者法之以虛受帝道用之而无偏者也原夫橐也者  
利于鼓風籥也者存乎運吹雖有質以克殊且無心而  
匪異故可以侔造化比天地一開一闔勃焉而元氣生  
變宮變商泠然而正聲至亦如天道無為地道博施于  
以麗百穀于以行四時皆虛中為動也故自外而應之  
是以橐之用則飛霆走電籥之運則如埴如篴信天地  
之義若此而橐籥之理在茲得不求諸繫表取自无間  
不言而應物妙用而循環趣聖域叩玄關昧其旨者徒

小心翼翼得其要者惟大智閑閑是知虛而不屈為橐  
之師動而愈出為籥之資本虛無而生矣因形器以觀  
其所以天地之心悠也久也帝皇之道斯焉取斯懿夫  
二儀昭合一氣夷猶或動或靜克剛克柔取乎鞫焉氣  
動而物來斯應類乎笛也樂出而人無我求至矣哉天  
地有大德其鼓動也于橐于囊天地有希聲其煦嫗也  
維筭維籥雖小大之不類信擬議而咸若今我后道合  
希夷心无適莫盖囊括以為用豈管窺而可度所以百

姓日用而不知又孰見聖人之有作

醴泉無源賦

王者之瑞何有源本

泉本靈長皆從濫觴何无源而自湧應有德以呈祥厥  
味孔甘可飲九苞之鳳其波不濁寧朝百谷之王豈不  
以地乃至柔水惟善下不愛其寶于以光乎聖人感而  
遂通于以歸乎王者俾沸渭以出焉奚疏鑿之謂也神  
化難知汪洋在茲視之者或分似帶挹之者或謂如飴  
匪自高山非貳師之刺矣不居絕塞豈耿恭而拜之有

以見德及于地不期而至其潤也齊乎聖澤其湧也備  
乎睿知浪井不鑿我則同出而異名靈芝無根我則重  
祥而疊瑞稽夫是泉也其源不見于義則那其味且旨  
在理云何得非源之隱也與凡流而有異味之美也表  
聖德而靡它不然又安得匪因掘地而自可蠲痼者哉  
出鳥鼠者非吾之耦產蛟龍者亦孔之醜鄙河水之九  
曲笑涇泥之一斗自然而然非有而有考乎支派應居  
水府之先效彼休禎合列祥經之首是何不在高原波

騰浪翻孰知乎桐柏孰謂乎崑崙任大禹之功深寧歸  
畎澮縱張騫之力盡曷識根源士有自立身謀非因世  
本桴學海以斯久導言泉而漸遠期作瑞於昌朝免常  
流之一混

火星中而寒暑退賦

心火中則寒暑斯退

惟大火之照臨亦舒陽而慘陰寒暑相交於時令經躔  
必在於天心冬夕午焉栗烈之風自止夏宵中矣鬱蒸  
之氣爰沉不知誰為種榆其名曰火隨衆星以拱極正

二氣而在我小人怨咨之語望之則銷大鈞吹煦之期  
違之莫可所以指命顓頊迴旋祝融自然無出其右寧  
勞舉正於中乍疑日馭逐魯陽之戈再懸碧落定星示  
楚宮之役迥挂長空遂使祁寒知難而少抑暑雨交綏  
而自息垂繒之壤知止衣葛之人動色不知我者謂我  
執造化而弄權知我者謂我正陰陽而作則類聖人之  
南面令之而必從任天道以右旋踰之而莫得至若北  
陸凶殘人斯鮮懽層冰飛雪以俱至挾纈重裘而罔安



我之中矣可以却彼司寒又若南訛赫怒人失其所焦  
砂爛石以何盛輕筵織締而曷禦我之中矣可以祛其  
酷暑是何表正二儀亭亭在茲營室櫓巢兮取之于彼  
收藏長養兮何莫由斯標不宰之功所以均乎六氣示  
无言之信所以成乎四時大矣哉行度无差寒暄自退  
天垂象以是仰世作程而斯在年年兮東作西成明明  
而可大

小畜集卷二

欽定四庫全書薈要卷一萬四千一百二十八

集部

小畜集卷三

宋 王禹偁 撰

古調詩

酬种放徵君

寄獻鄜州行軍司馬宋侍郎

寄題陝府南溪魚簡孫何兄弟

七夕

讀漢文紀

合崖湫

吾志

携稚子東園刈菜因書觸目寄均州宋四閣長

四皓廟二首

不見陽城驛

感流亡

除夜

竹鼯

觀鄰家園中種黍示嘉祐

蔬食示舍弟禹圭并嘉祐

酬种放徵君

一百韻此篇命為首重高士也

太歲在辛卯九月萬木落是時太陰虧占云臣道剥王  
生出紫微譴逐走商雒扶親又抱子迤邐過京索敝車  
載書史病馬懸囊橐西都不敢住空負香山約閨鄉正  
南路秦嶺峭如削肩輿碍巨石十步三四却妻孥亦徒  
步磧礫不容脚山店盖木皮煙火渾燠灼夜深聞質虎

全家屢驚懼山泉何縈回切冽无橋約卸鞍引羸蹄解  
襪事芒屨晨澗髮可鑒朝涉脛如斲商山六百里天設  
甘巖嶢上洛在其中狴牢曾未若逐臣自可死何必在  
遠惡刺史不我顧古寺聊淹泊卜居雜民氓致養无精  
繫知道由自寬有親强為樂側聞种先生終南卧雲壑  
長沮既躬耕元禮仍開學王績婦未娶介潔翹孤鶴之  
推母偕隱教誨脩天爵詩情亦嗜酒道氣不服藥田衣  
剪荷芰野飢烹菰藟霧豹澤文彩冥鴻避矰繳肯從羔

鴈聘唯恐簪裾縛如何宋右史鴈鶚議鵬鶚

起居舍人宋維

翰奏种放隱居終南乞量才錄用頗為識者所笑

玄纁與丹詔恩禮誠非薄

仍勅京兆府敦諭辭恭恪先生戀板輿純孝心堅確散  
髮走煙巒拜章謝恩渥巨材猶在澗大玉不出璞使者  
遂空迴軒輪何寂寞賢母召徵君庭責詞嗚嗚胡為事  
章句漏名入街郭府縣污我山胥徒噪吾幄以茲近聲  
利安得成高邈誓將徙窮谷庶可逃諠濁先生拜引過  
為壽開樽杓陶陶又熙熙何啻聞箏簫人傳到遷客面

目頗慙忤器小識不遠當年事頭角遭時得一第游  
宦何齷齪逐羶甚虬螭聞耀同熠燿宰邑乏弦歌諫  
垣無謬謬便蕃朱紫綬僭忝絲綸閣方號駸駸龍已  
困狴狴狴待罪始知非咄哉昧先覺一聆高世行罪  
髮庸可擢忍恥賦三章塵埃寄寥廓明年會恩宥量  
移井蛙躍靡暇謁南山征途望西嶽黃河波涵湧白  
逕苔斑駁中條圍解縣五老煙矗矗此焉為郡副烏  
敢事隕獲籠禽幸未死而且謀飲啄米呼村婢舂樵



顧山僮斫餵馬捧寒蕪看書藝秋籜信口亦吟哦放心  
無適莫君恩已絕望人事終難度相府一張紙喚起久  
屈蠖誠知有梁棟未忍棄榱桷五城天上開三殿雲間  
卓重取故衣冠籠裏山猿獍病翼得風雲壞墻勞赭堊  
諫官與史氏舊識聊羈絡舉袖拂石螭凝眸睨金雀冥  
心想前事一夢何揮擢長恐先生聞倚松成大喙關中  
朋友來遺我神仙作繁華遠容綺錚鏦美金錯古澹啜  
鉶羹大雅鏗木鐸千言距百韻旨趣何綽綽孰念氣如

虹翻然輕抵鵲癢甚麻姑爬快比屠門嚼渾金豈在鎔  
尺璧寧施琢愈風齊棒檄忘味同聞樂致之向懷袖日  
夕芬蘭若裒我塵俗韻鉛刀化干鎔同聲必有應過實  
還疑謔盛誇山中事雲屋張霞幕蘭芽含露採石髓和  
煙酌巢由泉滌耳園綺芝盈握有時上絕頂星斗近可  
摸下視塵世人營營似蟲螭男兒既束髮出處岐路各  
苟非秉陶鈞即去持矛槊致主比唐虞安邊如衛霍不  
爾為逸人深居返吾樸胡然自碌碌名節日銷鑠行年

過半世功業无圭勺无術鑄五兵使民興錢鏹無材統  
六師逐寇開沙漠空言說王道肆目看人瘼多慙指佞  
草虛效傾心藿一覽大雅文起予亦何博况茲山野性  
謨畫昧方畧搔首謝朝簪行將返耕鑿

寄獻鄜州行軍司馬宋侍郎

鉅賢如木鐸一振聲盖代丈人文曲星譴謫落下界辭  
源發崑崙意盡若倒海昔在神德朝少秀負文彩擢第  
應制舉召試拂華盖醉揮拔萃判一字不復改傳寫徧

都下紙貴無可買一命佐著作芸閣垂纓珮歌詩數千  
首人口炙與膾志大輕俸錢痛飲負酒債庸蜀既即叙  
出命王津宰題柱薄長卿銘閣笑張載錦水清見髮蛾  
眉綠於黛物華曾不負詩酒聊自待肯甘豈擇祿印綬  
久不解陶潛腰任折菜子衣有彩蹉跎歷四邑塵土不  
可擺吾皇在藩邸聞名四聰駭即位未浹旬獨許延英  
對相見恨已晚欣然契嘉會諫官聊假道紫微遽真拜  
制誥復西漢碑板揭東岱金鑾赴夜召顧問及遠大白

麻幾千紙意出元白外薦賢恐不及誇善曾無怠當朝  
自獨步晚節亦泛愛有別樂聞韶無譏詩自鄙賤子在  
廣場知見殊流輩進士數且千馳驚稱俊邁人人握靈  
蛇許我珠無類超拔冠多士權貴不得礙御前中科第  
閣下備寮案詎唯師碩德常許接佳話國朝大手筆日  
夕期鼎鼎胸中泰山雲舒卷何靈靈言下傳巖雨蓄縮  
未霽霈吾道遂難行一旦同得罪典午信冗散貳車更  
狼狽商於甚僻陋廊畸近山寨共月踰千里便風無人

介何當遂乘桴侍坐浮渤澥大笑引淳風樽前一長噫  
今茲當委順自昔無芥薑投詩助醉吟入室生徒在

寄題陝府南溪兼簡孫何兄弟

甲湖在陝服自昔名所重許昌擅唐律人口尚傳誦舊  
跡固秦莽勝槩猶出衆前年謫商於過此方憂恐無暇  
濯溪泉惻惻心甚痛量移遇恩宥方寸稍放縱故人孫  
漢公勤懇事迎送杞車得三宿延我入溪洞春殘尚有  
蝶夏首始見螭朱櫻實頗繁黃鳥聲亦喏地幽接府署

亭高瞰村壑，紫砌水逶迤。入簷山龍從，鯉翻自躍。金螭篆燒餘，永石危。君子介筍亂，小人勇虛涼。集鷗鷺爽塏，无蚊蠓芟葉巧。如剪萍根密，非種逕苔自。斑駁岸草亦，蒨葦官醞淥。開瓶時果青，出籠醉中猛。別後依約似一夢，唯愁當要路。時復棲闌茸，解梁雖近山。境垺實耕墾，常風自鹽南。日夕塵塤捧，雲泉既遼遠。草樹非秀聳，况兹炎蒸月。繫縛何所動，緬懷八龍會。南溪與誰共，棣萼本多材。甘棠應少訟，枕簟與琴書。鵠原聊自奉，篇章取

李杜講貫本姬孔古文閱韓柳時策開晁董清吹席上  
來當暑間冰凍菱脆擘瓊枝瓜甘浮蜜甯氣秋綠篠戰  
露曉圓荷捧照湖小賀監溪堂輕馬總此景且不同此  
懷可長慟平生好泉石況復官散冗近聞田紫微連水  
許就俸田舍人量移軍州表援例苟得請甲湖當日用  
終老占溪居卧看秋泉湧

七夕 商州作

去年七月七直廬間獨坐西日下紫垣東窓暈青瑣露



柳蜩忽鳴風簾驚頻過寂寂紅藥堦槿花開一朵時清

无詔誥性澹忘物我兀然何所營橫枕通中卧夢入無

何鄉蛺蝶甚么麼孰謂處深嚴自得放慵慵中官傳宣

旨御詩令屬和驚起儼衣冠拜舞蒼苔破逸翰龍蛇走

雅調金石播洋洋治世音乃賡强牽課暮隨丞相出自

謂天上墮歸來備乞巧酒榼間瓜果海物雜時味羅列

繁且夥家人樂熙熙兒戲舞娑娑

叶韻蘇可反

寵辱方若驚

倚伏忽成禍九月謫商於羈縻復窮餓鳳儀困鴟嚇驥

足翻鼃跛山城已僻陋旅舍甚叢脞夏旱麥禾死春霜

花木挫吾親極衰耄吾命何轆軻稚子啼我前孺人病

我左玄髮半凋落紫綬空垂拖客計魚脫泉年光蟻旋

磨昨夜枕簟涼西郊忽流火河漢勢清淺牛女姿婀娜

商土本硠礚商民久勞瘁霜旱固不支水潦復無奈

今歲

商山秋大水

居人且艱食行商不通貨郡小數千家今夕唯

愁呵吾兒索來禽

即林擒

傾市得一顆舉家成大笑愁眉

略舒蹕自念一歲間榮辱兩偏頗賴有道依據故得心

安妥窮乎止旅人達也登王佐匏瓜從繫滯糠粃任揚  
簸批鳳不足言失馬聊自賀委順信吾生无可无不可  
讀漢文紀

西漢十二帝孝文最稱賢百金惜人力露臺草芊芊千  
里却駿骨鸞旗影遷延上林慎夫人衣短无花鈿細柳  
周將軍不拜容橐鞬伯業固以盛帝道或未全賈生多  
謫官鄧通終鑄錢謾道膝前席不如衣後穿使我千古  
下覽之一泣然賴有佞倖傳賢哉司馬遷

合崖湫

合崖向嵌壑湫水何沖融渟污暨積潦滯泥不朝宗有  
時見鬼怪無人薦王公止可飲麋鹿未嘗產蛟龍山氓  
自神之祠祀衆口同今春商於旱太守職憂農先請境  
內山熊耳有如聾乃迎是湫水盈乎素缶中州民與郡  
吏覲女雜巫童朝祈又夕禱拜起虔且恭藝鑪復奠爵  
牲幣潔而豐適與天雨會三日勢濛濛致謝送水歸盡  
禮有始終水旱蓋定數災祥與政通傳巖道喪久咄爾

貪天功

吾志

吾生非不辰吾志復不卑致君望先舜學業根孔姬自  
謂志得行功業如皋夔既登俊秀科又在清切司諫紙  
无直言綸誥多媿辭黽勉為何事親老與妻兒一旦命  
執法嫉惡寄所施丹筆方肆直皇情已見疑斥逐深山  
中窮辱何羸羸于張及不得安用此生為

于定國  
張釋之

携稚子東園刈菜因書觸目兼寄均州宋四閣長

大鷲引新鷦小鷦哺老鳥青青樹木間禽鳥聲驩娛我  
携二稚子東園擷春蔬可以奉晨羞采采供貧厨非肉  
誠不飽割身實无餘緬懷宋閣老同日出京都謫官不  
携家留妻事老姑塊然武當下此樂固亦无

四皓廟

秦皇焚舊典漢祖溺儒冠萬民在塗炭四老方宴安白  
雲且高卧紫芝非素飡南山正優游東朝忽艱難高步  
揖萬乘拂衣歸重巒飛鴻自冥冥束帛徒戔戔古廟對

山開清風向人寒更無隱遁士空有賓客官況我謫官  
來塵跡污祠壇朝衣慙蕙帶佩玉媿紉蘭或依階下樹  
逃暑解馬鞍或借廟前水乘秋把魚竿吾道多齟齬吾  
生利盤桓登山殊未倦飲水聊盡驩精靈莫相笑此意  
樂且盤

其二

小言望小利載在禮經中遂有鷹犬輩拔劍各爭功一  
出定萬乘以若冥冥鴻寂寂千古下孰繼採芝翁

不見陽城驛 有序

予為兒童時覽元白集見唱和陽城驛詩稔貶江陵過  
商山感陽道州而作是詩也且改驛為避賢郵不忍呼  
其諱也樂天在翰林得而和之又見杜紫微富水驛詩  
題下解云富水驛舊名與陽諫議同卒章曰驛名不合  
輕移改留警朝天者惕然淳化二年秋九月予自西掖  
左宦商於訪其驛即无有也驗之圖經求諸郡境則富  
水地存而驛廢陽城之號遂莫知矣因作古風詩申明



三賢之作且以不見陽城驛為首句至于道州之行事  
元詩盡之矣此不復云

不見陽城驛空吟昔人詩誰改避賢郵唱首元微之微  
之謫江陵憔悴為判司路宿商山驛一夕見嗟咨所嗟  
陽道州抗直貞元時時亦被斥逐南荒終一麾題詩改  
驛名格力何高竒樂天在翰林亦和遷客詞遂使道州  
名光與日月馳是後數十年借問經者誰留題富水驛  
始見杜紫微紫微言驛名不合輕改移欲遣朝天者惕

然知在茲一以諱事神名呼不忍為一以名警衆名存  
教可施為善雖不同同歸化之基邇來又百稔編集空  
鱗差我遷上雒郡罪譴身繫維舊詩猶可誦古驛殊無  
遺富水地雖在陽城名豈知空想數君子貫珠若纍纍  
三章詩未泯千古名亦隨德音苟不嗣吾道當已而前  
賢尚如此今我復何悲題此商於驛吟之聊自怡

感流亡

謫居歲云暮晨起厨无煙賴有可愛日懸在南榮邊高

春已數丈和煖如春天門臨商於路有客憇簷前老翁  
與病嫗頭髮皆皤然呱呱三兒泣乳乳一夫鰥道粮无  
斗粟路費无百錢聚頭未有食顏色頗饑寒試問何許  
人答云家長安去年關輔旱逐熟入穰川婦死埋異鄉  
客貧思故園故園雖孔邇秦嶺隔藍關山深號六里路  
峻名七盤襁負且乞丐凍餒復險艱唯愁天雨音雪彊  
死山谷間我聞斯人語倚戶獨長歎爾為流亡客我為  
冗散官左宦无俸禄奉親乏甘鮮因思筮仕來倏忽過

十年峩冠蠹黔首旅進長素餐文翰皆徒爾放逐固宜然家貧與親老覩爾聊自寬

除夜

四十強而仕禮文可遵守筮仕已十年明朝三十九自知得祿早左官誠宜有年雖過潘岳未為全白首貧猶勝墨子黔突聊供口若比張辟疆吾甘為老醜若比太公望吾方為少秀任從新歲來且獻高堂壽更解金貂冠多貰商山酒

竹鼯

商嶺多修篁蒼翠連山谷有鼠生其中薦食無厭足春  
筍齧生犀秋筠折寒玉飫飽致肥腴優游恣蕃育林密  
鳶不攫穴深犬難逐鳳凰餓欲死彼實無一掬唯此竹  
間鼯琅玕已滿腹暖戲綠叢陰舉頭傲鴻鵠不知商山  
民愛爾身上肉有鍾利其鋒有錐銛於鏃開穴窘如囚  
洞胷聲似哭膏血尚淋漓携來入市鬻竹也比賢良鼠  
分類育俗所食既非宜所禍誠知速吁嗟狡小人乘時

竊君祿貴依社樹神俸盜太倉粟笙簧佞舌鳴藥石嘉  
言伏朝見乘大權夕聞罹顯戮李斯具五刑趙高夷三  
族信有司殺者在暗明于燭彼狡勿害賢彼鼠无食竹  
觀鄰家園中種黍示嘉祐

北鄰有閒園瓦礫雜荆杞未嘗勤耕牛但見投羣豕今  
夏赤旱天斲琢誰家子播種甚莽鹵苗稼安能起秋來  
連月雨柴門晝不啟新晴一携杖出戶聊徙倚重到田  
中立黍稷何疑疑吐穗欲及肩鳥雀聲亦喜力穡乃有

秋斯言不虛矣向使懶種植荒榛殊未已有書間不讀  
為學還如此

疏食示舍弟禹圭并嘉祐

吾為士大夫汝為隸子弟身未列官常庶人亦何異無  
故不食珍禮文明所記既非膏粱家左宦乏貲費商山  
禾侵旱穀價方騰貴更恐到明春藜藿亦不繼吾聞柳  
公綽近代居貴位每逢水旱年所食唯一器豐稔即加  
籩列鼎又何媿且吾官冗散適為時所棄汝家本寒賤

自昔無生計菜茹各須甘  
努力度凶歲


小畜集卷三



謹案卷一第二頁後七行築壇埤之三陞刊本壇  
作社據賦彙並宋文鑑改

第三頁前一行道人徇路刊本適訛遂據尚書改  
第十頁前八行叨四入于掖垣刊四作再按本傳  
及自序應作四今改





總校官庶吉士臣張能照

校對官中書臣金光悌

謄錄舉人臣秦朴

欽定四庫全書薈要

集部

小畜集卷

四至  
六

詳校官助教臣常循



欽定四庫全書薈要卷一萬四千一百二十九

集部

小畜集卷四

宋 王禹偁 撰

古調詩

懷賢詩 三首

桑魏公

李兵部

王樞密

五哀詩



故尚書兵部侍郎琅琊王公

故尚書虞部員外郎知制誥貶萊州司馬渤

海高公

故殿中侍御史滎陽鄭公

故國子博士郭公

故太子中允知洛陽縣事潁公

太一宮祭廻馬上偶作寄韓德純道士

送筇杖與劉湛然道士

對雪

金吾

送戚維戚綸之閬州亳州

送陳侯之任固州

送朱九齡

暴富送孫何入史館

贈劉仲堪

送馮尊師

懷賢詩 并序

僕直東觀時閱五代史見近朝名賢立功立事者聳慕  
不已思欲形于詩詠而未遑今待罪上雒不與郡政專  
以吟諷為事業因賦懷賢詩三首仍以官氏列于篇首  
云

桑魏公 維翰

魏公王佐才獨力造晉室揮手廓氛霾放出扶桑日感  
慨會風雲周旋居密勿下民得具瞻上帝賚良弼沉沉



帷幄謀落落政事筆品流遂甄別法令頗齊一跋勅朝  
據案論兵夜造膝多士若鴛鴻官材咸有秩諸侯如狼  
虎請謁盡股栗秉鈞多事朝綽綽有紀律遠將留侯比  
近以贊皇匹志在混車書誓將闡儒術皇天未厭亂運  
去何飈欵高祖厭寰區少帝無始卒老成既疏遠羣小  
相親昵黷武兵漸驕倒懸人不恤和親絕強虜謀師用  
悍卒魏公在藩垣上疏論得失七事若丹青辭切痛入  
骨忠言殊不省直道果見屈鐵馬從北來煙塵晝蓬勃

穹廬易市朝左衽雜纓紱主辱臣不死囚縛自安逸唯  
公獨遇害身殞名不沒惜乎英偉才濟世功未畢一讀  
晉朝史遺恨空鬱鬱子孫亦不振天道難致詰

李兵部濤

有唐張曲江盛名何曄曄請誅安祿山先覺不見納胡  
雛有反相其事遠相接賢人何代無舊史聊可獵兵部  
事晉朝文學科中甲強臣方跋扈朝士多恇怯獨持上  
方劍願斬犇鯨鬣堂堂張彥澤反勢凌閭闔拜章請顯

戮直氣不可壓三進叩玉墀植笏立莫莢皇情彌慰撫  
清問屢應答結馬念小恩曾不顧大業高吟歸去詩潺  
湲淚承睫旋踵即亂華有同虞不臘張公領鐵馬朝市  
胡塵合刺謁甚間詳辭氣殊不懾虎狼不敢害加禮為  
下榻當年棄謇諤異代居調燮相位席不煖帝澤安可  
洽斯人既淪亡此風亦蕭颯滑稽何足累大節世已乏  
安用學腐儒矻矻守禮法

王樞密

林

西樞經緯才慷慨遇真主文學中甲科風雲叅霸府直躬在密勿未始畏強禦凭案讀古書箕踞視太祖澤欲浸生民化將還遂古拆寺遇武宗排佛如韓愈盡髮羣必芻使之藝禾黍兵威遂強盛人力不耗蠹世宗征淮甸委任當留務馬前拜侯伯堦下列樁斧叱咤氣生風將校汗如雨手築太平基胼胝不輟杵具瞻人有望衰運時不與修短天難忱殲奪民何咄恩深與小歛撫樽甚悲沮云亡復殄瘁前哲非虛語世豈乏賢良才難具

文武歷象過羲和文章敵燕許可能隨衆人冥冥歸塵  
土子孫雖衆多必復事未覩誰銘遷客詩高揭王公墓

五哀詩

有序

予讀杜工部八哀詩唯鄭廣文蘇司業名位僅不顯者  
餘多將相大臣立功垂裕无所哀矣噫子美之詩盖取  
人之云亡邦國殄瘁而已非哀乎時也有未列于此者  
待同志而嗣之云

故尚書兵部侍郎琅邪王公

祐

琅琊名父子少孤起徒步勢謁桑魏公藻鑑非易與撫  
頂久歎惜王楊許為伍諸侯取為官佐幕大名府主帥  
杜重威功大心跋扈天驥被繫維神龜罹網罟六師薄  
孤壘三面開生路主人既釋放賓筵因詿誤逼脅本非  
辜貶謫尋不赴折腰紆墨綬塌翼久未舉梁竦恥州縣  
長卿有辭賦裏行旌邑政柱史登朝序糾彈志不樂潤  
色才有素錦窠應列宿星垣吟藥樹丹青主帝典金玉  
鏗王度東觀秉直筆南宮司貢部時英集門下藹藹騰

嘉譽鵬掀六月風豹蔚七日霧多材同列忌嫉惡奸人  
怒排斥屢專城織羅仍典午名官頗流離衣食嘗貧窶  
文明起代邸振拔非不遇紫微雖正拜白髮已遲暮史  
魚直有道根也剛不吐非才占清列志欲投兕虎英俊  
在草萊力能生翅羽毀譽兩无私華袞間蕭斧掌選循  
故實尹京恥鈎距名位僅三事疾瘵嬰二豎告滿拜貳  
卿君恩慰沈痼終見哲人萎蕭蕭空壠墓鯉庭有令嗣  
鳳閣啟仙署兩制列門生九原應自許蒼蒼猶足信吾

道似有訴餘慶存子孫明明深可據

故尚書虞部員外郎知制誥貶萊州司馬渤海高

公錫

丈自咸通後流離不復雅因仍歷五代秉筆多艷冶高  
公在紫微濫觴誘學者自此遂彬彬不蕩亦不野惜哉  
傷躁進忤旨出閣下吾君登大寶允澤連霽洒均陽又  
淮陽移徙曾不暇遂无牽復命虛偶文明化何路得自  
新賁志入長夜人謂賁太深終于郡司馬



故殿中侍御史滎陽鄭公起

柱史有名跡清才自天縱構思慶雲合落筆醴泉湧歌  
詩與文賦錚錚人口諷揚袂入澤宮鵠心一箭中恃才  
善戲譁負氣好侮弄大志有誰知細行乖自訟小諫事  
世宗惕惕佩光寵太祖方歷試握兵權已重上書范魯  
公先見不能用歷數不在周謳謠卒歸宋汗漫失屠龍  
接輿遂歌鳳行荷伯倫鍾高卧畢卓甕神德不為嫌優  
待臺憲俸晚求萬泉令吏隱官資冗一旦隨朝露識者

彌哀痛无子嗣家聲身世若一夢文編多散失人口時  
傳誦空持一器酒何處洗孤冢

故國子博士郭公

忠恕

汾陽飽經術賦性甚坦率在昔舉神童廣場推傑出尚  
書誦在口何論落自筆

公應舉時口念  
尚書手寫論語

總角取科名弱

冠紆纓紱早佐襄陰幕漢鼎入周室矢志罷屠龍佯狂  
逐捫虱周行亦黽勉吏隱多放逸滑稽東方朔圖畫王  
摩詰古文識蝌蚪與學辨萍實字窮蒼頡本篆證陽冰

失王績醉為鄉伯倫居無足俸錢乏一囊宦路從三黜  
朱衣多不着白髮仍慵櫛漸老羈旅年方見昇平日忽  
以伎術召此意殊鬱鬱放口忤无鬚何門求造膝遁逃  
終見捕譴逐道中卒遺孤落問閭荒塚鳴蟋蟀手澤漸  
難求誰家耀箱帙投弔焚此詩九原應有物

故太子中允知洛陽縣事潁公

贊

洛陽富文彩峭拔四子流提筆入廣場辭氣干斗牛擢  
第在芸閣言事觸冕旒左降宰百里道勝心无憂才高

恥吏役放蕩不檢脩起應賢良科下筆不見休青宮尚  
淹恤赤縣且優游輕財糞土賤高義雲天浮懸磬任貧  
窶盈樽長獻酬知己彼何人鳳閣與黿頭推挽終不起  
壯志將焉收晚年圯橋後關市良可羞忽焉為異物寒  
草封一丘孀嫠應凍餓交友誰尋求遺孫方稚齒爽秀  
已邁邁皇天若有憑必使光貽謀

太一宮祭迴馬上偶作寄韓德純道士

去年暨今夏承詔祠天神昔當搖落時宮葉紅紛紛此

來芳春暮宮草青萋萋三日奉齋潔百骸祛垢氛御署  
致恭虔天香何細縕監祀黃門郎攝宮紫微臣松枝拂  
劍佩樹影光播紳燈燭晃白晝香花藹清芬金殿禮神  
仙瑤壇醮星辰至誠不為已玄鑒當福仁質明祀事畢  
復命趨紫宸揚鞭入村落緩轡聊逡巡麥田少時雨蚕  
月無閒人自慙懷祿仕蠹此力穡民又拋三洞趣來入  
九衢塵不如韓道士長此養天真

送筇杖與劉湛然道士

有客遺竹杖九節共一枝鶴莖老更長龍骨虬且奇我  
問何所來曰從西南夷因思漢武帝求此民力疲明明  
聖天子德教加四維蠻貊盡臣妾縣道皆羈縻焚僮與  
笮馬入貢何纍纍此竹日已賤輕視如蒿藜我年三十  
七血氣未全衰況在紫微垣動為簪笏羈倚壁如長去聲  
物歲月無所施寸心空愛惜惜此來天涯忽承明聖詔  
來謁太一祠再見劉先生氣貌清且羸持此以為贈所  
謂得其宜少助僮力好引花鹿隨步月莫離手看山

聊楮頤微物懶致書故作筇竹詩

對雪

帝鄉歲云暮衡門晝長閉五日免常叅三館无公事讀  
書夜卧遲多成日高睡睡起毛骨寒牕牖瓊花墜披衣  
出户看飄飄滿天地豈敢患貧居聊將賀豐歲月俸雖  
无餘晨炊且相繼薪芻未闕供酒肴亦能備數杯奉親  
老一酌均兄弟妻子不饑寒相聚歌時瑞因思河朔民  
輸稅供邊鄙車重數十斛路遥幾百里羸蹄凍不行死

轍冰難曳夜來何處宿聞寂荒陂裏又思邊塞兵荷戈  
禦胡騎城上卓旌旗樓中望烽燧弓勁添氣力甲寒侵  
骨髓今日何處行牢落窮沙際自念亦何人偷安得如  
是深為蒼生蠹仍尸諫官位謬无一言豈得為直士  
褒貶无一詞豈得為良史不耕一畝田不持一隻矢多  
慙富人術且乏安邊議空作對雪吟勤勤謝知己

金吾

金吾河朔人事郡在賤列攀附周世宗龍飛起魚鼈委



質向聖朝積功取旄鉞所在肆貪殘乘時恃勲伐皇家  
平金陵九江聚遺孽彌年城乃陷不使雞犬活老小數  
千人一怒盡流血三惑無不具五福何嘗缺晚年得執  
金富貴居朝闕娛樂有清商康強無白髮享年六十九  
固不為夭折考終北牖下手足全啟發子孫數十人解  
珮就衰經贈典頗優崇視朝為之輟哀榮既如是報應  
何足說責簿李廣死賜劍武安滅僬倖過古人況無大  
功烈福善與禍淫斯言僅虛設吁嗟為儒者寒餓守名

節五十朝大夫龍鍾頭如雪無故不殺羊禮文安可越  
何況賓祀間貧苦無羊殺

送戚維戚綸之閬州亳州

古人貴道德豈以祿位拘有道不在位顏回舜之徒無  
德殃且至商受為獨夫以此固名節富貴安足圖睢陽  
戚先生今世古之儒終身不求仕沒齒唯誦書孝愛睦  
姻族淳謹化里閭文翁變蜀土尚以德位俱仲淹居汾  
水專用素教敷青青子衿輩櫛比曳朝裾盛德苟無報

吾道將焉如鯉庭生二子驪頷委雙珠朴愿有父風學  
業張皇謨各登進士科齊乘使者車閭中佐郡政毫社  
司推酤佐郡古半刺可使惇嫠蘇推酤今權道亦助軍  
國須牽車驥雖屈補履乃有餘誰謂佐著作在上積新  
芻誰謂光祿勲其中混瓊琚我亦何為者先上青雲衢  
伐木空求友拔茅未連茹終待奮直筆會當伏青蒲請  
慎名與器願分賢與愚彙征補皇極戮力張道樞巨魚  
方煦沫相忘在江湖冥鴻當順風接翼摩太虛此志尚

噎鬱此別良悲吁苦縣且密邇劔閣多崎嶇于役勿為  
歎加飯聊自娛尺素惠好音無惜雙鯉魚

送陳侯之任同州

丈夫貴自奮何必恃詔謀當年功不立古人重為憂太  
師忠順公沒世有餘休令子一何賢恥隨資蔭流碌碌  
奉朝請君恩何以酬鬱鬱不快意上章聞冕旒願為循  
良吏未甘恩澤侯天子嘉乃誠錫命蒞同州同州古三  
輔北望雄且優詔條得以布民瘼得以求勿謂綺紈子

當有襦袴謳詩云無忝爾禮云必為裘去去繼旌節免  
作將門羞

送朱九齡

吏隱不求貴親老不擇祿之子有俊才弱冠中正鵠弗  
墜先人業何慙有道穀一命佐碭山枳棘聊容足再命  
宰嘉興絲桐幾易俗率身甘菜茹養母求梁肉承顏苟  
不虧折腰未為辱解印無餘貲舟中只琴筑十口寄淮  
西一身來輦轂又說東南行秋風江水淥鄱陽古名郡

赤金流山谷每歲鼓錢刀從來設官局還得便高堂無  
辭縻逸躅颺帆江湖思木脫天地肅楓葉紫爛蓼花  
紅罽毼津吏曉來迎溪僧夜留宿至止事方簡優游從  
所欲江城豐稻梁水市多魚簋三載奉甘脆百錢飽家  
族自有綵衣華勿歎藍袍綠行年未三十氣壯顏如玉  
行義日以聞焉能長碌碌終列侍臣班耀我同年錄且  
賦白華詩唱作離筵曲

暴富送孫何入史館

孟郊常貧苦忽吟不貧句為喜玉川子書舡歸洛浦

孟郊

有忽不貧喜盧全書舡歸洛詩

迺知君子心所樂在稽古漢公得高科

不足唯墳素二年佐棠陰眼黑怕文簿躍身入三館爛  
目閱四庫孟貧昔不貧孫貧今暴富暴富亦須防文高  
被人妬

### 贈劉仲堪

劉生頗少秀為學識根柢丘軻有堂奧試脚到塔砌楊  
墨恣荒榛揮手欲芟薶携文訪謫居趣向非權勢對挹

雛鳳下交言孤鶴唳在璞認良玉行當為國器彼茁見  
靈茅佇可供王祭豈止隨衆人區區一枝桂宜哉孫漢  
公妻之以女弟吾家兄之子笄年未伉儷恨不早相逢  
取子為佳婿

送馮尊師

時再為拾遺

前日訪潘閭下馬入窮巷忽見雙筍石卧向青苔上云  
是馮尊師秋來留在茲今說東南行問吾堅乞詩又見  
宋閣老亦言師甚好欲去天台山即別長安道臺閣有



羣英贈別瑰與瓊琤然滿懷袖此事殊為榮安用徵吾  
句吾道方齟齬老為八品官有山未能去束髮號男兒  
出處貴得宜出則學臯夔獨立稱帝師處則同喬松決  
起如冥鴻誰能似蚯蚓蟠屈泥土中師行甚可羨雲鶴  
無羈絆為我持此詩題于桐栢觀

小畜集卷四